

**Aalisarnermut aningaasaliissutitut immikkoortitat pillugit Inatsisartut inatsisaata
allanngortinneqarnissaanut siunnersuut**

(Tapiisarnermut tunngavissanut allanngortitsineq)

Saqqummiussisoq Aalisarnermut, Piniarnermut Nunalerinermullu Naalakkersuisoq

pillugu

Aalisarnermut, Piniarnermut Nunalerinermullu ataatsimiititaliap isumaliutissiissutaa.

Siunnersuutip aappassaaneerpeqarnerani saqqummiunneqartoq.

Aalisarnermut, Piniarnermut Nunalerinermullu ataatsimiititaliap suliarinninnerani ilaasortat uku ilaapput:

Inatsisartunut ilaasortaq Aqqaluaq B. Egede, Inuit Ataqtigiit, Siulittaasoq

Inatsisartunut ilaasortaq Niels Thomsen, Demokraatit, Siulittaasup tullia

Inatsisartunut ilaasortaq Juliane Henningsen, Inuit Ataqtigiit

Inatsisartunut ilaasortaq Hans Aronsen, Inuit Ataqtigiit

Inatsisartunut ilaasortaq Karl Lyberth, Siumut

Inatsisartunut ilaasortaq Hans Enoksen, Siumut

Inatsisartunut ilaasortaq Finn Karlsen, Siumut

UKA 2011-mi ulloq 28. september 2011 siullermeerereernerup kingorna Ataatsimiititaliap siunnersuut misissorpaa.

Siunnersuutip imaa aamma siunertaa

Siunnersuutip saqqummiunneqartup siunertaraa isaterinermut tapiissutip angallatip sillimaserneqarnerata nalingata maanna atuuttup 75%-iniit 100%-inut qaffanneratigut isaterinermut tapiissutinik qinnuteqarnermut soqutiginninnerup annertusarnissaa. Angallatit sillimaserneqarsimangitsut arlaannaannulluunniit attuumassuteqanngitsumiit Aalisarnermut, Piniarnermut Nunalerinermullu Naalakkersuisoqarfimmiit toqqarneqartumiit, nalilerneqarsinnaalernissaat taamatuttaaq periarfissaalissaaq.

Isaterisarnernut tapiisarnerni ataatsimiititaliap ilaasortaannut aalisartut nassuiaasimapput isaterinissamut tapiissutip appasippallaarnera pissutigalugu qinnuteqaateqartarsimanatik. Tamatumunnga pequtaapput angallatip sillimaserneqarnerani amerlasuutigut nalikipallaarnera, imaluunniit angallatip sillimaserneqarsimannginnera. Tamassumallu kingunerisimavaa angallatinik isaterisarnerit malittarisassat atuuttut atuutilerneraniilli ikippallaarsimani.

Inatsisissatut siunnersuummi nalinginnaasumik naasuaatini paasissutissiissutigineqarpoq isaterinermut tapiisarnermi ataatsimiititaliap isumaqatigiittup allanguutit saqqummiunneqartut isumaqatigigai.

Inatsisissatut siunnersuutip saqqummiunneqartup makku allanguutit kingunerai:

1. § 15, imm. 2 imatut oqaasertaqartinneqassaaq:

”Stk. 2. Isaterinissamut tapiissutit annerpaamik sillimasiinerup nalingata 100 %-iata nalinganut annertussuseqarsinnaapput, piniutit ilanngunnagit.”

2. § 15-mi imm. 3 nutaatut ikkuunneqassaaq:

”Imm.3. Angallat sillimaserneqarsimanngippat, angallatip nalinga naliliisartumit arlaannaannulluunniit attuumassuteqanngitsumiit, Aalisarnermut, Piniarnermut Nunalerinermullu Naalackersuisoqarfimmiit toqqarneqartumiit, aalajangerneqarsinnaavoq. Qinnuteqartup angallatip nalilerneqarnerani aningaasartuutit akilissavai.”

Tamatuma kingorna imm. 3 imm. 4-ngorpoq.

Inatsisartut inatsisaat atuutilissaaq 1. januar 2012.

Tusarniaaneq.

Siunnersuut ulloq 17. maj 2011-imiit ulloq 27. juni 2011-imut ukununnga tusarniaassutigineqarpoq: KANUKOKA-mut, Sulinermik Inuussutissarsiuteqartut Kattuffiannut (SIK), Sulisitsisut peqatigiiffiannut, NUSUKA-mut, KNAPK-mut, Inuussutissarsiornermut Suliffeqarnermullu Naalackersuisoqarfimmut, Ilaqutariinnermut Naalackersuisoqarfimmut, Peqqissutsimut Naalackersuisoqarfimmut, Nunamut Namminermut, Pinngortitamut Avatangiisinullu Naalackersuisoqarfimmut aammalu Aatsitassanut ikummatissanullu Pisortaqarfimmut tusarniutigineqarpoq.

Naalackersuisoqarfiup makkuninnga tusarniaanermut akissutinik tigusaqarsimavoq: SIK, Inuussutissarsiornermut Suliffeqarnermullu Naalackersuisoqarfik aamma Nunamut Namminermut, Pinngortitamut Avatangiisinullu Naalackersuisoqarfik.

Inuussutissarsiornermut Suliffeqarnermullu Naalakkersuisoqarfik nassiunneqartunut oqaaseqaateqanngilaq.

Nunamut Namminermt, Pinngortitamut Avatangiisinullu Naalakkersuisoqarfiup taamaallaat siunnersuutip oqaaseqaatitaanut oqaaseqaateqarput. Oqaaseqaatigineqartut siunnersuummut ilanngunneqarput. Oqaaseqaatigineqartut ”Pisortanut tunngatillugu aningaasaqarnikkut aqutsinikkullu kingunissai” aamma ”Avatangiisinut pinngortitamullu kingunissai” tunngassuteqarput.

SIK oqaaseqaateqanngilaq, siunnersuummik tapersersuinerat eqqaassanngikkaanni.

Tamatuma kingornatigut 30. september 2011 allakkatigut KNAPK ilaatigut kissaateqarpoq pissutsit Ataatsimiititaliami ilaasortanit maluginiarneqassasut, aalisartut nutaanngitsunik angallataatillit angallataatiminnik nutartererusukkaluartut periarfissaq atorusullugu paasiniaagaangamik, paasisaraat aalisarsinnaanermittut licens ilanngullugu annaassallugu, taamaasillutillu aserorteriniarnertik unitsittarlugu.

Siunnersuutip Ataatsimiititaliamit suliarineqarnera.

Sinerissap qanittuani aalisarnermi pissutsit tunngavigalugit inatsisissatut siunnersuut Ataatsimiititaliamit ajunngitsutut isigineqarpoq. Sinerissap qanittuani angallatit akornanni ullutsinnut naleqqutinngitsunik suli angallateqarpoq, taamaattumillu inuttaasut akissarsiaqartissinnaanissaannut peqatigitillugulu angallatip naammaginatutmik pitsaassuseqarnissaanut angallataatillit naammattumik matussusiinissamut naammattumik isertitaqartarnersut qularnarluni. Umiatsiat nutaannginnerit aamma amerlanertigut sillimaniarnerup, motorip atorsinnaassusaagut, atorluarsinnaanertigut inaaliiveqarnikkullu pisoqalisimaqaat.

Isaterinissamut tapiissutinik qinnuteqarnissamut angallatit periarfissallit amerlassusaat pillugit 2009-p naajartornerani takussutissiaq.

Angissutsit	Angallatit	Agguaqatigiissillugu pisoqaassusiat
05 < 10 BRT	31	36
10 < 20 BRT	47	42
20 < 50 BRT	4	41
50 ≤ 75 BRT	4	39
Katillugit	86	

Angissutsit	Angallatit	Agguaqatigiissillugu pisoqaassusiat
08 < 10 BT	5	32

10 < 20 BT	1	25
20 < 75 BT	5	46
75 ≤ 120 BT	2	35
Katillugit	13	

Ataatsimiititaliaq isumaqarpoq aalisariutit pisariaqartumik nutarteriffigineqarnerannut aaqqissuussaanerisalu naleqqussarneranut inatsisissatut siunnersuut ilapittuutaasinnaasoq, taamaaliornikkut isumalluutit atorluarnerunerisigut aalisarnerup pitsaanagerusumik unammillersinnaasup aalisartunut inuiaqatigiinnullu iluaqutaanerusup pilersinneqarnissaanut periarfissaq ammaanpeqassaaq, taamaalillunilu naggataagut aalisarnermik inuussutissarsiut aningaasarsiornikkut imminut napatittoq ataavartumillu imminut pisariaqartutigit naleqqussarsinnaasoq pilersinneqassalluni.

Angallatip sillimaserneqangitsup nalingata naliliisartumit arlaannaannulluunniit atuumassuteqangitsumit nalilerneqarsinnaanera pillugu aamma qinnuteqartup angallatip nalilerneqarnerani aningaasartuutit akilissagai pillugit aalajangersagaq isaterinissamut tapiissuteqartarnek pillugu maanna allassimasumi kaajallaasitakkut pioreersumit inatsisitigit aalajangersagaavoq. Naliliinermut atatillugu qinnuteqartoq aningaasartuutini nammineq akiliisassasoq naleqquttuusoq Ataatsimiititaliaq isumaqarpoq. Ilaatigut angallataatillip angallammik sillimasiisimangitsup taamaalillunilu naliliisitsisimangitsup sillimasiinermi akiliut sipaarsimassavaa, ilaatigullu isaterinissamut tapiissuteqarnissamik qinnuteqarnissamut isumaliuteqarnermini qinnuteqartup akissaajaat nammineq ilanngussinnaavaa.

Ataatsimiititaliaq Naalakkersuisunut kaammattuivoq, maleruagassat allanngortinneqassasut, taamaalillutik aalisartut angallammik nutaangitsumik isaterinissamut tapiissutinik qinnuteqarsimasut immaqalu aalisartut allat peqatigalugit umiatsiamik nutaamik pissarsinissamik kissaateqartut akuersissutertik piginnarsinnaassavaat.

Siunnersuutip aningaasaqarnikkut kingunerisassai.

Siunnersuutip kingunerisussaangilaa aningaasaliissutit ilassutissaanik akuersissutiginnittoqassasoq. Pissusiviusutigit ersernikuuvoq missingersuutitut naatsorneqartunut sillimasiinerup nalinga angallatip nalinginnaasumik niuerutigineqarnerata nalingata missaaniittoq. Angallatit annikippallaamik sillimaserneqartarsimanerisa kingunerissavaa tapiissutaasinnaasut ikinnerunissaat. Allannguutissatut siunnersuutip qulakkiissavaa aningaasaliissutaasut pilersaarutigineqartut atorneqarnerulernissaat.

Ataatsimiititaliap inassutai.

Ataatsimiititaliaq isumaqatigiittoq inatsisissatut siunnersuutip saqqummiunneqartup Inatsisartunit aappassaaneerneqarnerani akuerineqassasoq **inassuteqarpoq**.

Taamaattorli Ataatsimiititaliaq isumaqatigiittup peqatigitillugu Naalakkersuisut **kaammattorpai** pingajusaaneerinninnermi allannguutissatut siunnersuummik saqqummiussissasut, taamaalillutik aalisartut angallammik nutaanngitsumik isaterinissamut tapiissutinik qinnuteqarsimasut immaqalu aalisartut allat peqatigalugit umiatsiamik nutaamik pissarsinissamik kissaateqartut akuersissutertik pigiinnarsinnaassallugu.

Taamatut oqaaseqarluni isumaliutissiisummilu allassimasutut paasinnilluni Ataatsimiititaliaq siunnersuut aappassaaniigassanngortippaa.

Aqqaluaq B. Egede
Siulittaasoq

Niels Thomsen
Siulittaasup tullia

Hans Aronsen

Juliane Henningsen

Karl Lyberth

Finn Karlsen

Hans Enoksen